



驚悸

海昌王士雄孟英
定州楊照葵素園同校

張子和治衛德新之妻旅中宿於樓上夜值盜劫人燒舍驚墮牀下自後每聞有響則驚倒不知人家輩躡足而行莫敢言觸有聲歲餘不痊諸醫作心病治之人參珍珠及定志丸皆無效張見而斷之曰驚者為陽從外入也恐者為陰從內出也驚者謂自不知故也恐者自知也足少陰膽經屬肝木膽者敢也驚怕則膽傷矣乃命二侍女執其兩手按高椅之上當面置一小几張曰娘子當視此一木猛擊之其婦大驚張曰我以木擊几何以驚乎伺少定擊之驚又緩又斯須連擊三五次又以杖擊門又遣人擊背後之窗徐徐驚定而笑曰是何治法張曰內經云驚者平之平者常也平常見之必無驚是夜使人擊門窗自夕達曙夫驚者神上越從下擊几使其下視所以收神也一二日雖聞雷亦不驚德新素不喜張至是終身厭服知有人言張不知醫者執戈以逐之雄按分外入內出可謂一言破的古人皆云心主驚而不知情志字皆從心惟驚字從馬以馬無膽故善驚驚則傷膽尤為卓識其論治豈常人所能測識哉余嘗謂亙古以來善治病者莫如戴人不僅以汗吐下三法見長也

卜氏子年二十八歲病身弱四肢無力面色蒼黃左脇下身側上下如臂狀每發則痛無時食不減大便如常小便微黃已二三載矣諸醫計窮求張治之視其部分乃足厥陰肝經兼足少陽膽經也曰甲膽乙肝故青其色黃者脾也診膽脈小此因驚也驚則膽受邪腹中當有驚涎綠水病人曰昔曾屯軍被火自是而疾作乃夜以舟車一百五十九濟川散四五錢加生薑自汗平旦果下綠水四五行或問大加生薑何也曰辛能剋木也下後覺微痛令再下之比前藥三之一又下綠水三四行痛止思食反有力張謂卜曰汝妻亦當病卜曰太醫未見吾妻何以知之曰爾感此驚幾年矣卜曰當被火我正草堂中熟睡人驚喚我寐中驚不能言火已燬門我父拽出我火中今五年矣張曰汝膽伏火驚甲乙乘脾土是少陽相火乘脾脾中有熱故能食而救穀熱雖能化穀其精氣

